

Minzczuz Gyauyuz Cingzcik Hungloet

民族教育结硕果

——Geiq Hongsaeh Sonhag Cuengh Gun Song Saw Vah Binhyangz Yen Couhhih Cin Lungzdangz Siujyoz

□bonjbauq gicej Vangz Hauyioz Dangz Lungz



▲ Swcigih Gyauyuzdingh lingjdauj, lauxchangz daeuj sonyinx guhhong.

▲ Lauxsae aeu sezbei moq daeuj son'gyauq Sawcuengh yaugoj ndei.

◀ Lauxsae aeu denswj bwzbanj son'gyauq Sawcuengh.

Binhyangz Yen Couhhih Cin Lungzdangz Siujyoz dieg youq baihbaek Couhhih Cin, 1966 nienz hainduj laeb. Aen hagdangz neix fuzvu vunz Lungzdangz Cunh, aen cunh neix dwg ranghdieg Bouxcuengh, Yauzczuz comzyouq, miz 2600 lai vunz. Ndaw hagdangz seizneix miz 181 boux hagseng, ndawde it daengz roek nienzgaep 149 boux, yozcenzbanh 32 boux. Miz gyau cizgungh 12 boux. Aen hagdangz neix dwg Cuengh Gun song saw vah sonhag saedniemh hagdangz, guh Cuengh Gun song saw vah sonhag. Banh minzczuz gyauyuz hawj vunzlai hab'eiq, neix dwg hongsaeh goekgaen aen hagdangz neix. Lai bi daeuj, Lungzdangz Siujyoz ginggvaq lai daih vunz doengzcaeaz haenqrengz, mboujduenh hawj cizlieng sonhag ndaej daezsang hwnjbae, vih guekgya, sevei beizyangj le haujlai vunzcaiz maenhndei.

2012 nienz, bang lingjdauj moq hwnjdaej lo, dingh le hwngfat muzbyauh: Haenqrengz dawz hagdangz dajcaux baenz aen hagdangz Cuengh Gun song saw vah caemhcaiq minzczuz daegsaek noengzna, beizyangj vunzcaiz sausu minzczuz, swnjcienz vwnzva minzczuz, vih vwnzva dangdieg, minzczuz gyauyuz okrengz. Vih guh daengz aen muzbyauh neix, gyoengqde haenqrengz cengndaej gak fuengmienh haeujcoengh, gaenh geij bi neix, hagdangz gak fuengmienh cungj ndaej hwngfat baenaj.

2012 nienz, youz Gvangjsih Gyauyuzdingh haeujcoengh, aen hagdangz neix ndaej buedhawj 10 fanh maenz cienmonz cawx gij doenghyiengh yijyinh sezbei sonhag Cuengh Gun song saw vah, gya miz le buek denswj sezbei ndeu, hawj aen hagdangz neix guh yendaiva sonhag laeb ndei giekdaj.

Youz Binhyangz Yen Minzczuzgiz haeujcoengh, aen hagdangz neix gya cawx le gij doenghyiengh gicaiz guh sausu minzczuz conzdungj diyyuz yindung, youq 2014 nienz haggeiz seizcou gya cawx le 70 dauq ndangdaenj sausu minzczuz nem sezbei byaujyenj, lai ndei hawj vwnzva minzczuz haeuj ndaw hagdangz.

Haenqrengz haeujsim bae guh gij hozdung doxdax gvendaengz Cuengh Gun song saw vah sonhag. Lumjnaeuz guh hozdung doxdax aeu Vahcuengh doegsaw, linghvaih bae daengz hagdangz wnq hag gingniemh, caeuq gyoengq lauxsae hagdangz wnq doxgyau. Lumjnaeuz caeuq Bwzsanj Siujyoz doengzcaeaz guh hozdung, miz doxdax gangj gojgaeq Vahcuengh, doxgyau sonhag Cuengh Gun song saw vah, doxdax sonhag Cuengh Gun song saw vah daengj. Caeuq ndaw swcigih gak hagdangz beixnuengx doxgyau, 2008 nienz, daengz Dwzbauij Yen guh hozdung doxgyau sonhag Cuengh Gun song saw vah; 2011 nienz, caeuq Majsanj Hozcoz Siujyoz doxgyau daengj. Doenggvaq doxgyau, daezsang le suiijingz sonhag Cuengh Gun song saw vah.

2013 nienz haggeiz seizcou, aen hagdangz neix youz Binhyangz Yen

Minzczuzgiz nem Couhhih Cin Cungsim Yozyau roengzrengz haeujcoengh, gawjbanh le daih'it gaiq sausu minzczuz conzdungj diyyuz yindungvei, guh ndaej swnhleih. Daengx hagdangz it daengz roek nienzgaep hagseng cienzbouh camgya. Baez yindungvei neix gungh guh le haj aen doxdax hanghmoeg, baugvat dik lwggienq, sam vunz haizgieg beij vaiq, ringx gengxdiet, dwk lwgyangq, lai boux diuqcag. 2014 nienz haggeiz seizcou, youz ndaw yienh minzczuzgiz haeujcoengh, aen hagdangz neix gawjbanh le daihngieh gaiq sausu minzczuz conzdungj diyyuz yindungvei, guh ndaej swnhleih.

Linghvaih, aen hagdangz neix gonqlaeng youq 2014 nienz nem 2015 nienz haggeiz seizcou guh minzczuz funghcingz haeuj hagdangz vwnzyi comzyienj hozdung. 2014 nienz haggeiz seizcou gya cawx le 70 dauq ndangdaenj sausu minzczuz nem sezbei byaujyenj, hawj hagseng lai gyaemaj minzczuz conzdungj diyyuz nem vwnzva minzczuz, hawj aen hagdangz neix laeb ndei giekdaj, lai ndei guh minzczuz vwnzva gyauyuz, minzczuz vwnzva haeuj hagdangz, hix vih aen hagdangz neix lai ndei hwngfat baenaj.



▲ Gij senhconzlanz ndaw hagdangz gig miz daegsaek minzczuz.



▲ Aen douhung hagdangz.



▲ Guh yindungvei liux lauxsae nem hagseng sim'angq hab'ingj.



▲ Youq ngoenz "roek it" diuq foux minzczuz angq gvaq ciet.



▲ Bingzciengz, hagseng angq diuq fouxfaexsax.



▲ Youq gwnz yindungvei, hagseng haenqrengz ringx gengxdiet.